

Regional News Unit AIR Aizawl
Saturday, October 05, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- State Transport Authority chuan tun hnaiah kawngpui chhia leh tuialhthei man tihsan chhuanlama, khualzin phur lirthei chuan man tisang an awm chu tha an tih loh thu an sawi .
- Chief Minister Pu Lalduhoma'n Pediatrics Intensive Care Unit (PICU) a thawk mek Nurse 36 te leh anmahni puitu mi 19 te, tun September thlaa an hna tawp te chu thawk chhunzawm turin a ti.
- Tukin dar 7 atang khan Haryana Assembly inthlan atan vote thlak tan a ni
- Prime Minister Narendra Modia chuan India-a chip siam te chu reiloteah khawvel pumah zawrhchhuah ala ni ang a ti

<><><>

STA

Mizoram State Transport Authority chuan tun hnaiah khualzin phur lirthei zingah chuan man tihsan duh awm mahse, tun dinhmunah chuan man ennawl tul an ti lo.

STA chuan tun hnaiah kawngpui chhia leh tuialhthei man tihsan chhuanlama, khualzin phur lirthei chuan man tisang an awm ni-a hriat a ni chu tha lo an tih thu an sawi a. Tuna lirthei chuan man hman mek chu kumin March ni 12 atanga hman tan chauh a ni a, thla 7 vel chauh hman a la nih avangin State Transport Authority chuan khualzin phur lirthei chuan man ennawn chu tun dinhmunah tul an tih loh thu an sawi.

STA chuan Lirthei chuan man chu kalphung mumal tak nen, hunbi neiin a ennawn thin an ti a, ennawn a nih dawnin District tina Deputy Commissioner kaihhraina hnuaiian NGO hrang hrang te, a kaihhnawih lirthei pawl leh mipui aiawh, Consumer's Union-te nen rawtna siam tir thin an ni a, chung rawtna an dawn zul zui chuan mipui tana rit lo tur leh lirthei neitute tan pawha na lo turin a man hi bithliah thin a ni tih an sawi.

STA chuan, an hnena khualzin phur chi lirtheiten permit an dilna form-ah Sorkar-in lirthei chuan man a bithliahte zawm turin an intiam sa vek a, permit an lak chhuah dawnah pawh Sorkar thu zawm tura intiamin, an hming an sign leh vek bawh thin tih an sawi a, lirthei neitute chu sorkar rate anga tlan thin turin an hriattir a. Sorkar rate zawm lo emaw, Sorkar duh loh dana hmalate chu an permit cancel thlenga hmalak theih a nih thu leh mipuite pawh sorkar rate bithliah anga lirthei hmang thin turin an chah bawh.

◇◇◇◇

CM

Chief Minister Pu Lalduhoma'n Pediatrics Intensive Care Unit (PICU) a thawk mek Nurse 36 te leh anmahni puitu mi 19 te, tun September thlaa an hna tawp te chu thawk chhonzawm turin a ti.

Chief Minister hian hemi chungchangah hian Health & Family Welfare Principal Director Dr. Vanlalsawma hrilhin hma la zui turin a ti a, an tel lova ICU tam tak a kal zui theih dawn loh avangin an hna lo thawk chhonzawm turin a tih thu a sawi.

Heng PICU te hi Covid19 hripui len laia Emergency Covid Response Plan 2 atanga district paruka din te an ni.

Chief Minister Pu Lalduhoma hian nimin vek khan a pisa-ah Sawrkar laipuaia Ministry of Agriculture & Farmers Welfare Jt. Secy Pi Yogita Rana kawmin Mission Organic Value Chain Development for North Eastern Region hmalakna a sawipui.

Chief Minister chuan Missions Organic hmalakna chu Hand Holding Policy nena tha taka kal kawp thei a ni a ti a. Tha zawka Mizorama kalpui tura chahin Yogita Rana hian an hmalakna leh hmachhawp hrang hrang hipchiar takin a hrilh a ni.



DP&AR MINISTER

DP&AR Minister Pu K. Sapdanga'n Mizoram inrelbawlina kawnga Sawrkar fawng pawimawh leh sang chelh tur Mizo an awm tlem chu tanlak thar a pawimawh a ti.

He thu hi Zoram Research Foundation, Mizoram IAS Association leh The Aijal Club-te tangkawp buatsaih, Mizoram tana All India Services Cadre hranpa chungchang zirhona nimina a neih a hmanpui na ah sawiin Pu K. Sapdanga chuan All India Services-ah Mizo inziak tling an tlem zel chu veiawm a tih thu sawiin Mizoram inrelbawlina kawnga sawrkar fawng pawimawh chelh tur Mizo an tlem zel chu a veiawm tih sawiin tan lak a pawimawh hle a ti a, Tun dinhmunah Mizoramin All India Services sanctioned post IAS 32, IPS 19 leh IFS 19 a neih mek thu leh, Sawrkar laipuiin IAS leh IPS 6 ve ve a rawn dah thar thu a sawi a. State Sawrkar hnuiaia a pumhluma All India Services-te an awm theih nan State bil Cadre neih chu thil pawimawh tak nia a hriat thu sawiin, service hun pumpui State danga insawnkual reng lova hmun khata hman hian hnathawh kawngah rah tha a chhuah thei dawn a, Cadre review-te pawh ngaihtuah tel a pawimawh a ni, a ti bawk.

He hunah hian Mizoram All India Services Cadre hranpa a neih loh avanga inrelbawlna kawnga harsatna a tawh thinte, cadre hranpa neih thatna leh that lohna nia langte tawnhriat nei tawhte'n chipchiar takin an sawi a. Mizoram puala All India Services Cadre hranpa neih a hun tawh takzet thu leh Cadre Review Committee ngaihpaawimawh tel a tul thute tarlan a ni.

Tun dinhmunah Mizoram hian All India Services (Indian Administrative Service, Indian Police Service & Indian Forest Service) Cadre hranpa a nei lova, AGMUT Cadre-ah a awm mek a. AGMUT Cadre hnuaiyah hian Arunachal Pradesh, Goa, Mizoram leh Union Territory-te an awm a ni.



BRBAE

Birth Registration Based Aadhaar Enrollment (BRBAE) chu Mizoram ah kalpui tan a ni a. He hmalakna hnuaiyah hian naupang (nausen piang hlim atanga kum 5 thleng) tan Birth Registration behchhan in Aadhaar Enrollment a tih theih tawh dawn a ni. National Health Mission, Mizoram chuan October ni 2 atang khan a kalpui tan a ni.

Naupang kum 5 thleng te tana Aadhaar enrollment samkhai zawka tih theih tawh niin, tunah hian Civil Registration System (CRS) portal atangin Birth Registration Number hmangin automatic-in data a lak theih tawh dawn a. Naupang birth certificate leh a nu emaw a pa Aadhaar number chuah a ngai a ni.

He hmalakna hi tangkai zawka mipuiin an chhawr theih nan National Health Mission, Mizoram chu Child Enrolment using BRBAE process hmanga Child Enrolment ti turin Registrar cum Enrolment Agency ah ruat a ni.

UIDAI chuan state tinah inziritrna workshop te, door to door enrolment te buatsaih thin in, hmun kilkhawr zawkah te kalin Aadhaar tangkaina mipuiin an chhawr theih nan hma a la thin a. India hmarchhak state-te tana UIDAI hmunpui ber, Regional Office chu Guwahati ah awmin, he office hi state sorkar hnuaiya General Administration Department, Aadhaar kaihhnawih a hmalakna hrang hrang atana Nodal Department nen kawng hrang hrangin hma a la ho thin a ni.



Saitual consumer

Saitual District Consumer Protection Council huaihawtin DC Conference Hall-ah Consumer Rights Awareness Programme nimin khan hman a ni a, he hun hi DC Dr Lalngura Tlau chuan a hmanpui a, Centre for Consumer Education, Aizawl Chairman Pu Lallunghneman kalkhawmte a zirtir a ni.

Pu Lallunghnema chuan diklo taka thiltituten mipuite-ah harsatna an thlen thin chu engtia tih bo tur nge tiin a vei thu a sawi a, Consumer Union hnuaiyah chuan ukil pawhin a awmzia a awm lo a ni a ti, Consumer Protection Act chu ram changkang apiangah an uar a ni ati a. Consumer-te chu smart consumer ni theuh turin a chah bawk. Resource person chuan consumer-te hi lal an ni a, cunsumer tello chuan dawr an kal theilova, ram economy pawh consumer-te ah a innghat thuk hle a ni a ti. Medical negligence, deficiency service, access warranty, product liability, mediation tih te chu dan tharah section 74-81na inkarah dah anih thu te a sawi bawk.

Tuna Consumer Protection Council hnathawh pawimawh em em mai chu sawirem/palai hna thawh hi a ni a ti.

He hun hmannaah hian Consumer te lungawilohna thlenna tur forum hrang hrang, District, State leh National Commission ah te thlen theih anih thute, heng kawnga harsatna sukiangtu pawimawhtak chu Consumer Union a nih thu te, Legal metrology hnuaia bukna leh tehna dik hmante, MRP aia sanglova bungraw zawrh leh hralhte, LPG buk dik tak leh phui tha hralh hman/leite, Cement&Iron Rod buk tlinga hralh bakah POL te uluk taka endik thin te leh chumi chungchanga diklo taka ti thinte chungga dan ang hremna/action lak theihna kawng hrang hrangte pawh inhrilh hriat a ni.

He hunah hian consumer club thar pathum Govt. Saitual College, Govt Saitual Higher Secondary school leh District Higher Secondary, keifang te lawmpuina leh Resource person te lawman hun hman a ni a. District Protection Council memberte bakah All NGO aiawh, khawchhunga dawrlan neite leh retailer-te an tel a ni.



SARAS FAIR 2024

Rural Development Minister Prof Lalnilawma'n hnam rilru pu chungga mahni hnam thilsiam ngaihsan inzirtir a pawimawh tih sawiin Mizo thilsiam hlut leh chawisan chu hnam hmasawn nan a pawimawh tih a sawi.

He thu hi Hnahsin Kut Champhai-a neih mekah Mizoram State Rural Livelihood Mission (MzSRLM) buatsaih Sales of Rural Artisans Society Fair (SARAS) Fair Aui Garden-a a hawna ah sawiin Minister chuan ramdang thilsiam tha tak tak awm mahse mahni hnam siam hlut sak a pawimawh tih sawiin hnam rilru pu chungin mizo dawr hrang hrang te dawr zel turin kalkhawmte a ngen a, hmasawn ngaihna laiah mipuite thurawn la zel turin Department a inpeih tih a sawi bawk.

Minister chuan SARAS Fair thil tum ber chu Self Help Group-te thil tharchhuah, hralh chhuah leh mipui hmaa pholanna remchan zawn a ni a ti a, mipui hip thei turin a tuamna leh a hming pawh duan a ni tih sawiin ei leh in phochhuah chu Food Safety and Standards Authority of India hnuai ziah luh vek an ni a ti a, mipuiten hlut sak turin a ngen bawk.

SARAS Fair hi MzSRLM bultumin kum 2015 atang khan neih ÷an a ni a. Kum tin State Capital leh District Headquarters a neih ÷hin tura ruahman a ni a, SARAS Fair 2024 hi SARAS Fair vawi kua na niin October ni 4 a ÷anga ni 11 chhung neih tur a ni. He hunah hian Mizoram hmun hrang hranga Self Help Group ten Stall 44 ah an thil siam te an pho chhuak a ni.

Self Help Group ah hian tun dinhmuna chhungkaw 81,829 an inziaklut tawh a, SHG-te khaikhawm tur hian Village Organisation 791 leh Cluster Level Federation 84 din a ni tawh bawk.



HARYANA ASSEMBLY

Tukin dar 7 atang khan Haryana Assembly inthlan atan vote thlak tan a ni. Haryana-ah hian Assembly seat 90 awmin inthlan hi thawkhkata zawhfel tur a ni a. Voter vaibelchhe 2 nuai 3 sing 5 sang 4 leh 350 an awm a. Polling station 20,632 awmin candidate hi mi 1031 an awm.

Chief Electoral Officer Pankaj Aggarwal chuan polling station tinah inthlanna felfai leh zalen a awm theih nan ruahmanna siam vek a ni a ti a. Polling station tinah webcasting tih vek a ni bawk.



PRIME MINISTER

Prime Minister Narendra Modia chuan India-a chip siam te chu reiloteah khawvel pumah zawrhchhuah ala ni ang a ti. Nimina Kautilya Economic Conclave, New Delhi-a neihah he thu hi sawiin PM Modia chuan ramchhungah semiconductor plant panga din thuai a ni ang a ti a. India chu mobile phone lalut tu ni thin kha tunah chuan a thawchhuaktu lian tak a ni tawh a ti a. Sum peipung duh tan ramchhungah remchanna a tam tawh thu a sawi bawk a ni.

